

欽定剿平三省邪匪方略

欽定剿平三省邪匪方略正編卷三百三十

壬戌年

七月二十八日

丙申

勒保奏言竊

臣

前飭巫山大

寧兩路官兵截剿楚省竄匪惟時川東邊界處

處有楚省剿散之賊並聞叅贊德楞泰有帶兵

赴張公橋一帶之言

臣

查該境爲竹谿入川之

路德楞泰旣帶兵前來諒此路賊勢較重必須

嚴密防堵

臣

卽飭達勒精阿武隆阿等一路官

兵在徐家壩花柳坪等處往來偵探猶恐邊界
綿長不敷分佈必須添兵策應查有副都統銜
達斯呼爾岱副將羅聲臯等一路官兵本在東
太前中後三河一帶搜捕零匪近日該境漸次
肅清無須此路重兵在彼剿辦因卽飛札調令
達斯呼爾岱羅聲臯等帶兵由城口老林抄赴
大寧一帶協同防剿十三日探得前次楚境竄

來劉賴二逆股匪經達勒精阿武隆阿等迎剿
截回該匪聞叅贊大兵有至張公橋一路之信
不敢深竄楚境復繞出陝楚邊界由一碗泉雞
心嶺黃墩等處折竄入川向大渝河桐油壩一
帶竄走約有四五百人臣查達斯呼爾岱羅聲
臯等已從太平老林帶兵前來正可就近剿辦
當卽飛札飭令迅速探剿達斯呼爾岱羅聲臯

等聞信卽連夜兼程前來由萬古寺翻山向甘
龍硎一路進發十五日酉刻行抵上三壩探得
賊匪已向東門關竄走官兵與賊相距一百四
五十里達斯呼爾岱羅聲舉計議官兵若事尾
追恐賊匪遠遁遂連夜帶兵抄出沙陀子過河
該處河水正漲並無渡船恐天明賊匪知覺卽
乘夜躡渡令馬隊泅水先行步隊挽挈馬尾相

繼洶渡兵勇幸無衝失天色黎明探得賊匪在東門關相近之閭王塢屯紮尙未起竄官兵分爲三路直前衝擊乘賊不備立斃賊匪三四十名生擒十一名賊匪驚竄卽搶上雙古墳山梁恃險抗拒拋擲石塊兵勇受傷數名並不稍退經格亨德爾帶領馬隊首先衝上步兵乘勢繼進鎗箭齊發極力仰攻搶上山梁賊匪不能抵

敵始行潰散四路奔竄適海常肅鳳來兩路官兵齊至將賊匪壓下山溝兜圍殲戮共斃賊二百餘名生擒一百三十七名餘匪鑽越林箐亡命竄匿官兵分投搜捕復擒獲賊九十八名當官兵將賊匪壓下山溝時見賊隊內有黃布大旗一桿上有龍字及先鋒賴飛龍字樣帶領四五十人奪路奔逃官兵知係首逆四面圍住將

該匪全數殲擒訊問活賊據稱賴先鋒已被官兵箭斃當令指認賊屍割取首級其餘活賊內有偽千總劉華梅玉二名女賊七名內有黃號首逆龍紹周之姪媳周氏偽先鋒沈文學之妻董氏其餘大半係旗手戰手亦有被擄難民共二百四十六名口

臣

提訊活賊據供係黃號龍

紹周餘黨龍紹周死後卽係賴劉兩先鋒爲首

後來與王國賢合夥前日在湖北被官兵打散
王國賢不知存亡賴先鋒劉先鋒便帶了我等
竄走川境又被川省官兵截殺劉先鋒被兵衝
散賴先鋒要回湖北因聽得德將軍大兵在張
公橋不敢過去所以要想從陝西邊界竄往雲
陽開縣一帶搶糧攜人不想官兵前來都被拏
住賴先鋒被箭射死等供當將所割首級飭令

辨認僉稱實係賴先鋒首級確鑿無疑當將偽
千總及旗手戰手等一百一十八名分別正法
其餘被擄難民一百二十六名口遞籍安插內
周氏董氏二口雖被賊姦佔爲妻究係被擄難
婦應免緣坐一併遞回楚省原籍查喚親屬給
領又前次由楚竄來張長青等一起賊匪
臣飭
令遊擊羅思舉帶兵剿辦該遊擊連日帶兵由

紅池壩寒水壩向家灣茅嶺等處探剿十二日
行抵馬家營探得賊匪百餘人在開縣所屬乾
溪一帶竄走羅思舉卽帶兵往剿適有辦理馬
家營團練之委員經歷楊沛雲因聞有賊卽帶
領團勇五百名前來抄擊羅思舉當與楊沛雲
會商跟剿詎該犯知有官兵先已逃遁官兵鄉
勇極力窮追沿途殺二十餘名直追至渡口崖

地方趕上賊匪圍住殺斃四十餘名生擒七十
三名並將賊首席上品殲殺此起賊匪全數擒
斬淨盡其活賊解赴臣營訊明正法其餘被脅

難民分別遞籍安插又前此由大寧邊界竄往
城口零匪一起經達勒精阿武隆阿等派都司
楊正雄守備李朝相分兵跟追茲據報稱該匪
約有二百餘人官兵由板櫓扒石筭寨兩路抄

擊該境山路險隘賊匪憑高抗拒守備李朝相
把總李維頂等均被石傷仍奮勇率領兵勇衝
擊殺斃賊匪三四十名滾崖跌斃十餘名生擒
五十一名餘匪不及百人向王家壩分水嶺奔
逃當將活賊解交太平廳審辦臣查楚省殘匪
此時正剿急四竄賴先鋒一起經達斯呼爾岱
羅聲臯等晝夜兼程抄襲日行一百七十八里

及至沙陀子地方河水漲發馬步官兵不避艱
險乘夜淌渡始將此股兇圍剿淨首逆亦臨陣
殲除該將士等實屬認真出力當此大功屆蒞
之時似應量加鼓勵臣現撥銀五百兩分賞兵
勇其出力將弁容俟詳悉查明再行請

旨獎勵至雲陽一帶所有張長青一起餘匪業經羅
思舉等帶兵追剿茲又騰出達斯呼爾佔羅聲

畢等一路兵力卽令前往會同搜捕辦理自更
迅速再臣查川省本年春季以來仰仗

天威事機實形順利現在只剩搜捕零匪事宜不日

卽可肅清臣屢沐

恩施所有軍營出力人員似應欽遵前奉

諭旨擇其勞績最著者保奏激勸查有重慶府知府

石韞玉漢州知州周偉業跟隨臣軍營辦理一

切事務審辦賊匪日久不辭勞瘁又候補知府
黃銑辦理隨營糧務衝鋒冒險轉輸無悞又安
縣典史曹秉讓臣隨軍營繕寫奏摺迄今七
載始終出力以上四員爲軍營勞績最著之員
可否仰懇

聖慈俯准將石韞玉黃銑周偉業三員

賞戴花翎曹秉讓一員

賞戴藍翎以示獎勵其餘辦理團練防守地方之員

尙有出力者其勞績深淺不同容

臣

詳加查核

分別等第俟大功全竣再行具奏再永寧道陳

預總辦糧餉歷今三年處處撙節覈實級急得

宜籌備供支從無貽誤現雖丁憂離任勞績素

著尙須辦理糧餉似未便獨令向隅可否准其

一體

賞戴花翎令於百日孝滿後再行戴用出自格外

鴻慈奏入

上命軍機大臣傳諭勒保曰此次勒保探得湖北餘
匪劉賴等逆折竄入川卽分飭達斯呼爾岱抄往
迎擊殲擒賊匪四五十名該匪搶上山梁恃險抗
拒擲石下擊格亨德爾帶領馬隊首先衝上步兵
乘勢繼進又殲擒賊匪四百三四十名並將賴逆

及全股夥匪悉數殲斃皆由勒保調度得宜所致
甚屬可嘉勒保著加恩交部議敘並賞給四喜玉
搬指一個玉翎管一個黃辮大荷包一對小荷包
四個達斯呼爾岱羅聲舉海常蕭鳳來格亨德爾
等一經勒保札調卽兼程抄截不避艱險乘夜淌
渡將賴逆一股兜圍剿淨均屬奮勇出力均著交
部議敘其餘在事出力員弁並著勒保查明分別

等第開單保奏候朕加恩茲發去水晶搬指十個
大荷包五對小荷包十個分賞此次出力各員并
又一兩重銀牌一百面五錢重銀牌一百面分賞
出力兵勇以示獎勵其竄入大寧雲陽一帶之張
長青股匪經官兵抄截憑高抗拒守備李朝相把
總李維頂身被石傷仍奮勇督兵衝擊共計殲擒
跌斃賊匪一百餘名亦屬可嘉李朝相李維頂著

以應陞之缺陞用現在楚省竄匪昨據德楞泰奏統計不及三千今竄入川境者又被川省官兵擒斬幾及千名是楚匪日形衰敗德楞泰等已督率官兵緊躡逼剿該匪等情急或均向川省邊界奔竄則川東一路堵剿尤爲喫緊當此功屆垂成之際勒保務當嚴飭鎮將等毋分畛域不但竄入川境者當悉數殄除卽相近邊界者亦當出境迎截

與楚省官兵勢成夾擊更可迅速集事總期於八月內將各路零星竄匪一律剿淨不可稍有稽延近以勒保屢次成功頗知奮勉已將伊弟永保授爲二等侍衛並將永保之子景志賞給藍翎侍衛英華賞給護軍校皆因勒保推恩更當倍加感奮迅奏膚功俟捷奏到日再加懋賞

同日

上諭內閣口勒保奏請將川省軍營出力文員擇其
勞績最著者先行保奏懇恩量加獎勵等語知府
石韞玉候補知府黃銑知州周偉業俱著加恩賞
戴花翎典史曹秉讓著加恩賞戴藍翎又丁憂道
員陳預總辦糧餉從無貽誤著暫留川省辦理糧
餉並加恩賞戴花翎俟伊百日孝滿後准其戴用

二十九日

丁酉

吳熊光奏言查各股零匪恃深山

老林爲穴窟總在房竹歸巴一帶往來竄遁股
數尙多茲據總兵德昌孫清元稟報據寨民報
稱草坪廟坪一帶突有一股賊匪竄至攻圍三
保天星二寨索取糧食該鎮等當卽率同將弁
分路前進副將朱士奉遊擊馬濟盛守備周永
泰等帶兵馳至三保寨該匪一見官兵四散逃
竄朱士奉等趕上壓剿鎗箭並發斃賊三十餘

名滾崖跌斃者數十名其攻圍天星寨之賊經
總兵孫清元率同叅將烏爾喜訥遊擊姜元祥
郭朝鳴王有都司薛忠全等趕往迎截斃賊二
十餘名將圍寨賊衆壓至廟坪河下時值總兵
德昌由河岸一路趕到互相截殺復殲擒數十
名餘匪向廟坪後山狂遁總管托爾托保叅將
烏爾喜訥等帶領馬兵追殺三十餘里沿途殲

斃七十餘名散出男婦六十八名口餘匪乘暮
逸入老林德昌等率兵於林外紮營駐守次日
進林搜捕復獲賊十六名連日斃賊一百六十
餘名生擒五十九名散出男婦八十四名口訊
據僞總兵唐宗起據供本係線字號餘黨本年
三月由四川逃至湖北遇著賴先鋒們合夥共
有七百多人賊營內並無元帥只有賴姓熊姓

沈姓王姓四個先鋒還有尹姓王姓李姓並該
犯四個總兵等語當經德昌等將該犯嚮割其
餘矛手五十八名卽行正法散出被裹男婦給
予銀米路票逐一省釋又據帶領鄉勇之都司
麻光裕等稟報該都司由竹谿邊界追捕賊匪
至巴東屬長峯一帶探有賊匪一股在羅家溝
民房屯紮該都司帶同鄉勇乘夜掩襲殺賊二

十餘名生擒二十八名次早訊據獲犯供稱此股係青號元帥姓劉有個魏姓先鋒在營管事夜間已被兵勇殺死等語該都司正在搜捕間又據寨民報稱柳樹灣有賊一股屯擾約四五百人該都司以所帶鄉勇無多恐日間進剿難期得手仍於深夜分兩路進擊時值賊匪佔住民房俱已睡熟該都司率同衆勇吶喊圍殺有

身披皮馬褂首先衝出一賊經衆勇攢矛格殺
並將所披皮馬褂奪獲其餘衆賊慌忙亂竄經
鄉勇分投截擊斃賊百餘名生擒九名訊據獲
犯劉起鳳供稱此股賊首係黃號有個掌櫃唐
文開又有個唐先鋒不知名字今唐先鋒已被
兵勇殺了等語該都司當將獲犯正法旋聞堆
子廠一路有零匪出沒該都司隨探隨剿前進

沿途復殺賊數十名生擒六名訊係黃號龍紹
周餘黨龍紹周死後有個賴先鋒爲首還有姓
尹姓王及不知姓名的四個總兵昨日遇著官
兵趕來尹總兵已被殺死等語餘匪四下逃散
竄至巴東縣屬之紗帽山一帶屯聚該處文武
分帶兵勇迎擊賊人尙敢據山擲石抗拒兵勇
直前衝殺將當先執旗賊目一名用鎗擊斃餘

匪翻山折竄兵勇內亦有傷亡至蒲添寶賊股
據採經叅贊德楞泰轟出鮑家山後晝夜向南
狂奔現分一股竄往巴東一股竄往川屬大昌
一帶德楞泰與蒲尙佐亦分投兜擊前進諒不
致深入川境臣查此時賊股雖每股只數百人
然蹤跡飄忽多係積慣矛手現已嚴飭各鎮將
趕緊搜捕不敢稍任疏懈奏入

上命軍機大臣傳諭吳熊光曰此次德昌孫清元朱士奉等分路趕剿零匪每處俱有斬獲所辦尚好昨據勒保奏到已將楚省竄川賊匪賴飛龍一股全數剿淨殲擒不下千人是湖北各股零竄之賊日漸減少而陝境首逆苟文明亦據額勒登保奏到業經官兵殲戮南山餘匪即可殄盡此時功屆垂成不妨剿撫兼施亦不忍盡行誅殛昨已降旨

諭知德楞泰剴切宣諭令賊匪及早投出免其一
死茲再著吳熊光出示曉諭以陝省首逆苟文明
現被經畧擒斬積年老教逆匪均已殄盡無遺現
在經畧統領勝兵前來楚境其四川餘匪亦經辦
淨勒總督卽日帶兵至楚大兵雲集士馬精強剿
此區區殘敗之賊勢如拉朽摧枯爾等萬無苟免
之理我皇上體如天好生之德節降恩諭爾等如脞

身賊隊及早投出不但從賊夥匪被其逼脅者概
予省釋卽賊目等果能悔罪自新亦當量加寬貸
爾等當此死生呼吸之際急宜猛省毋再執迷不
悟自取誅夷如此明白宣示多方傳布賊匪等知
有路逃生或可漸自解散成功更可迅速但一面
仍當嚴飭德昌孫清元吉林泰等奮力搜剿趕緊
辦淨不可稍有延緩並當飭令局員將糧運源源

供連總須於八月內廓清全境速蕲大功爲要

三十日

戊戌

陸有仁奏言查斬逆賊匪前經扎克

塔爾等剿敗隨由月亮坪竄至亮坪垭火燒營

一帶扎克塔爾楊芳等現在分投截剿又張逆

零匪五六十人竄至盤匡縣屬之寬溝經寨長

莫龍等率勇迎截殲斃賊匪六名陣亡寨勇三

名

臣

已飭縣厚加賞卹又川省太平縣境賊匪

一股由西鄉鹿池壩竄入紫陽鹿柳壩經查寨
委員程樹功率勇迎擊斃賊五名適總兵汪啓
亦帶兵趕到賊卽折回九滾坪復經原任總兵
楊奎猷副將王福帶兵截剿擒殲三十餘名餘
匪仍遁入太平境內又前竄寧羌水田坪之賊
經慶溥截剿後已由羅家壩凍綠場一帶奔入
川省南江聞總兵許文謨等近在彼處自當探

蹤截擊查連旬以來南山一帶賊勢零落逃出
賊匪甚多各路督辦司道大員率同印委各官
鼓勵寨勇到處均皆擒捕自十餘名至數名不
等除無關緊要者隨時分別辦理外現據督辦
寨堡道員吳沂率同鎮安縣知縣胡彬稟報於
縣境曹家坪地方拏獲逆匪李貴成據供曾與
伍懷志同當元帥等情

臣

查李貴成係上年冬

上命軍機大臣傳諭陸有仁曰各處寨民等將餘糧屯窖原住空房以致被賊搜得陸有仁令將收糧未淨之家隨地責處并將所存之糧賞與出力寨民自應如此辦理其鄉勇一項除護糧護餉之外概行裁減所辦亦是近日賊匪無從掠食愈形飢困自己萬分窮蹙額勒登保等現在分投搜剿張二張三靳士黃等無難尅日辦淨陸有仁惟應轉

飭局員將糧運隨時接濟不可稍有缺乏以期速
藏大功況鄉勇業多裁撤人數較少支應更爲寬
裕陸有仁務當撙節支用妥爲經理

欽定剿平三省邪匪方略正編卷三百三十一

壬戌年

八月初二日

庚子

吳熊光全保奏言

臣

全保查楚

省現存餉銀僅數月餘之用前此盤查司庫本年奏銷案內存有地丁等銀三十一萬餘兩現在各屬間有被水受旱之處又須留備工賑只有本省捐監銀兩截至六月底共存銀八萬四千六百兩於司庫地丁項下通融湊足十萬之

數解交襄局以濟急需目下德楞泰統率大兵
在楚所有需用糧餉亟應寬爲籌備且本省防
剿兵勇爲數亦復不少並善後一切需用殷繁
合無仰懇

皇上天恩俯准於隣近地方再行

賞撥銀五十萬兩解楚俾資接濟再查據藩司孫玉
庭詳稱現在大兵雲集需米甚多本年撥解各

處截留漕南二米及商捐米石共八萬七千餘
石業已全數解交襄鄖宜昌等處目前不致缺
乏但軍營支用浩大省城爲各營後路旣無儲
備而各屬倉穀節次動撥已多又有水旱不齊
之處應須留備緩急不必再行碾用現在軍米
一項不得不藉隣省協濟安徽省近連湖北挽
運較便並懇

聖恩飭令安徽撫臣或於附近水次州縣動碾倉穀
或卽趕緊採買湊足十萬石之數解楚存貯接
濟兵精以期有備無虞奏入

上命軍機大臣傳諭吳熊光全保曰楚省竄匪不日
卽可剿淨一切軍需糧餉最關緊要自當寬爲籌
備現降旨諭令馬慧裕將兩淮解豫存貯項下撥
銀三十萬兩並傳諭佶山在兩淮鹽課奏銀二十

萬兩一併委員解楚應用至安省採買米石一節
本年安徽州縣間有被旱之處糧食恐未能充裕
現諭知王汝璧酌量該省情形如該處附近水次
州縣倉穀足敷碾動或趕緊採買可以照數運往
固屬甚善倘不能足數該督等亦祇可就安省解
到米石儘數撙節支放勿誤軍儲爲要

同日

上命軍機大臣傳諭王汝璧曰據吳熊光等奏應需兵米接濟請飭安徽巡撫於附近水次州縣內動碾倉穀或趕緊採買湊足十萬石解楚等語湖北軍務現在卽可告戡應需兵米最關緊要該撫自應照數辦運迅速解往但安省間有缺雨之處恐糧食未必充裕著王汝璧酌量情形或碾動倉穀或用價採買若能趕辦齊全固屬甚善倘實不能

如數購辦或稍減數萬石亦無不可總須於市價
民食不致妨礙方爲妥善該撫辦得若干萬石一
面迅委妥員解楚一面卽行具奏不可稍有遲緩
上又命軍機大臣傳諭馬慧裕曰前經諭令佶山將
兩淮應行解京之欸撥銀六十萬兩解往河南存
貯備撥茲據全保奏請撥銀五十萬兩以爲楚省
軍需善後之用除傳諭佶山另行籌撥銀二十萬

兩解楚外著馬慧裕卽於前項備撥銀兩內撥出銀三十萬兩派委委員解往湖北備用

上又命軍機大臣傳諭佑山曰據全保奏請撥銀五十萬兩以爲楚省軍需善後之用除諭令馬慧裕將兩淮解存豫省銀六十萬兩內撥銀三十萬兩解楚外著傳諭佑山於兩淮鹽課項下再籌撥銀二十萬兩派委委員迅速解赴湖北備用

初四日

士寅

德楞泰勒保奏言昨因蒞逆並熊翠

等匪分竄川界

臣

德楞泰帶兵緊躡前來

臣

勒

保當卽馳赴巫山一帶督兵堵截二十二日行

至龍泉寺適總兵張績先已帶兵到彼據稱二

十日探剿賊匪行至螞蝗口遇見探路賊匪數

十人一見官兵卽折回原路逃竄張績督兵緊

躡追剿至牯牛窖地方見後起賊匪在彼屯劄

約有七八百人我兵分兩路進剿叅將桂涵遊
擊門繼春都司傅廷標等帶兵由惠家塘席家
溝一路抄截張績率同遊擊馬明德晉之璉畢
萬年由二台子等處帶兵進攻斃賊二三十名
生擒二十四名內訊出僞先鋒李仁道一名據
供此股係青號餘黨熊翠熊方青爲首因湖北
被官兵剿急要回四川不料遇著官兵迎剿把

我們拏住等供張績當將該犯等正法其時餘

匪由關坪山溪河竄回楚境張績正欲帶兵追

剿又據探報蒲遊股匪八九百人已由八石坪

一帶奔竄前來

臣

勒保卽督同該鎮在龍泉寺

扼要堵截維時蒲添寶股匪經

臣

德楞泰督兵

在桐木園趕剿該逆竄至巴東天生橋又與白

號張阮二姓賊匪合夥向廟堂河西奔竄仍令

色爾滾蒲尙佐等帶兵由相思嶺向西北一路

前進臣德楞泰同賽冲阿長齡溫春富僧德馬

瑜等直趨巴東之陳家坡觀音崖一帶兜截該

逆因聞我兵分投趕追卽由阮村板倉坪等處

竄去探知川界龍泉寺有兵堵截復折向後窖

傍倚楚界老林奔逃臣德楞泰等帶兵由陳家

坡繞向川楚交界之洋溪河一路兜截色爾滾

蒲尙佐等跟蹤追擊二十二日馳至馬塘地方
趕上賊匪官兵奮力攻剿殺賊四十五名生擒
三十七名追至白菓園又斃賊二十餘名餘匪
向小陰條嶺逃竄訊據獲賊張祿供稱我們蒲
元帥與黃號唐李兩姓餘匪合夥要想逃向四
川去等供該犯等均係戰手概行正法其時
德楞泰師次洋溪河與龍泉寺相距六十里

臣

臣

勒保聞信馳往於二十四日會合適據達勒精
阿武隆阿等報稱該副都統等由花椒坪向通
城一路探剿二十二日據報張公橋左手半山
有賊屯聚達勒精阿武隆阿卽派副將鄭啟貴
等分帶兵勇繞赴魚坪河遏截賊匪由大禾田
竄川之路達勒精阿武隆阿等帶領馬步官兵
由張公橋前進均於是夜五更發兵天甫黎明

兩路官兵齊抵該處賊匪散處民房約有七八
十人我兵一擁而進斃賊三十餘名生擒二十
三名訊係分出探路擄糧之賊其大夥匪衆現
在梨子坪屯紮達勒精阿武隆阿等卽帶兵馳
往賊衆聞信挑出戰手三百多人佔踞梨子坪
山梁抵敵達勒精阿武隆阿等親帶馬隊由左
手抄擊另派鄭啟貴張良槐馮元等分兵追剿

賊匪分投抗拒達勒精阿武隆阿等一路官兵
抄上山梁鎗箭齊發殺賊一二十人匪衆不能
抵敵始翻山奔潰官兵分路追擊賊又分股由
右手山溝遁逃鄭啓貴等帶兵截殺又斃賊十
餘名餘衆竄走野猫崖老林步隊兵勇跟追入
林見身穿綢衫賊首一人指令匪衆憑高拋擲
石塊向下壓擊正在相持間達勒精阿武隆阿

趕到督率兵勇競進有兵丁李正順鄉勇游貴
爭先搶上將督戰之賊殺斃奪獲令字小紅旗
二面餘匪卽紛紛奔走官兵乘勝分投趕剿先
後共擒活賊一百二十九名奪獲賊旗鎗矛甚
多當令旗手劉複等指認所殺賊目據稱係襄
陽白號僞元帥楊有貴等語達勒精阿武隆阿
將該逆首級及活賊一併解送前來臣等會同

查訊據該匪劉復供稱我們原係白號高三股內之人高三被拏僞元帥楊有貴帶了我們一百多人到老林內藏躲今年六月內有齊家營餘黨二百七八十人張家營二百多人合夥走到竹谿地方又遇蒲元帥一起他說德將軍官兵在湖北追殺得利害要想到四川陝西各處老林躲避我們白號與齊家營的人在前行走

藍號蒲元帥的人在後相隔一天多路不料我們走到梨子坪就被官兵打敗等供又訊出戰手楊明志等三十六名卽與該匪劉複一併分別正法其餘被擄難民查明遞籍安插又臣德楞泰接據總兵李天林副將孫應奉等稟稱探得有藍白各號零匪跟蹤追逐十七日追至萬古寺前三四里之大石崖下見賊衆男女幼孩

二三百人已過河岸尚有鳧水渡河之賊一百餘人被官兵趕殺鎗箭齊發擊死及帶傷淹斃賊匪七八十人適仙女寨首屈紹輝等見官兵於半渡掩殺亦率領團勇用鎗礮插石轟擊又斃賊三十餘名探得該逆尙有三百餘人已翻山走三閭鄉一帶官兵擬由大峽渡河探蹤截剿又據總兵德昌孫清元等稟報該鎮等在昌

古坪一帶探剿據報有賊百餘人在該境攻圍
寨硎德昌孫清元卽帶兵往捕賊匪遙見官兵
卽奔上圓嶺半山山上民房內又突出賊匪二
百餘人併力抗拒官兵一面極力仰攻一面分
兵繞上山梁橫截賊衆不能抵敵奔上圓嶺山
頂我兵奮勇衝殺共斃賊四十餘名生擒二十
七名餘匪翻越界嶺四散逃逸訊係藍白黃三

號剿散之賊合夥男婦共有四百多人等語德
昌孫清元將所獲賊匪分別正法釋放現在

臣

德楞泰同賽冲阿長齡溫春色爾滾馬瑜蒲尙
佐等帶領官兵仍趨楚境將蒲逆等股分投趕
剿其熊翠熊方青一股餘匪竄往巴東一帶急
須派兵剿辦查有總兵吉林泰一路官兵本在
保康一帶剿辦戴四崔胡等賊茲該起賊匪已

經擊斃百餘名淹斃百餘人餘匪只剩二百餘人竄走穀城地界經吳熊光派委副將樊雄楚蔣觀濤帶兵接手剿辦吉林泰已帶兵回抵興山與巴東相距較近

臣

德楞泰卽飛飭吉林泰

將熊逆股匪就近迅速辦理其二竹歸州境內

餘匪卽分飭德昌孫清元李天林上緊搜捕

臣

勒保暫紮巫山地界如該逆被剿折回卽當督

率張績等扼要堵截以期迅速殲除及早蕝事
奏入

上命軍機大臣傳諭德楞泰勒保曰此次蒲逆等股
經德楞泰等分投追趕向南奔竄探知川界有兵
堵截復折回楚境熊翠熊方青等匪亦經張績截
回看來楚境竄匪處處遇有官兵攔截勢難遠竄
更形窮蹙現在德楞泰等帶領官兵分投趕剿蒲

[illegible]

理又就時日目下勒保一路兵力有餘德楞泰何不與之商酌或於達勒精阿武隆阿等員內派令一人酌帶官兵前赴巴東幫同吉林泰搜剿以期熊逆一股及早殄除淨盡至勒保在巫山一帶督率張績等扼要防堵折川楚匪卽不便帶兵深入楚境亦應隨時迎探倘竄匪經德楞泰追剿情急仍復向南分竄勒保竟當移師至楚省邊界截剿

使賊匪前後受敵更易蔽功其達勒精阿一路殺斃賊目之兵丁李正順鄉勇游貴應如何施恩之處著德楞泰酌量保奏候朕加恩

初六日

甲辰

額勒登保奏言竊

臣

率領官兵由洵

陽壩前進並將總兵李應貴副將張廷楷等所

帶官兵訓回於二十三日陸續趕來各官弁兵

勇等在老林內剿捕日久情形極爲勞苦

臣當

卽於

欽頒賞項內動撥銀兩宣示

聖恩分別獎勵官弁兵勇無不感激歡呼

臣

飭將兵

力稍爲整頓卽探聽各股餘匪確蹤分投剿捕

乃連旬以來山內雨水連綿河水處處漲發官

兵阻隔不能遄發據扎克塔爾楊芳等報稱靳

士黃股匪由火燒營一帶零星奔逃本月初八

日於月亮坪追及零匪八十餘人經兵勇殺斃
十五人賊向林內遁去與副將張瑗追剿之一
二百人合夥東竄裏巢一帶扎克塔爾格布舍
張瑗等由王家河裏巢跟追楊芳帶兵由四畝
地取道甘家砭顧東抄剿探得賊匪遁入板房
溝楊芳卽帶兵由金雞河進發因連日大雨河
水阻隔楊芳帶兵翻越險山覓路而進二十三

日至大南巖據寨民報稱老林內有零匪藏匿
楊芳卽率領官兵潛往搜捕零匪在山巔草房
內屯聚我兵於霧雨中乘其不備一擁直前殲
斃賊匪一人餘匪驚潰滾巖跌斃三人生擒十
一人內有賊目郭士善一名楊芳一面由南金
溝等處探剿斬逆殘匪一面將獲賊解送臣營
訊據郭士善供稱係苟文明股內先鋒被官兵

衝散帶領十五個人在林內藏躲不料官兵冒
雨到來拏獲等供當將該犯凌遲處死其餘從
逆日久之犯均卽正法又據慶成報稱本月十
三日聞有東北竄來賊匪一百餘人於藥庵子
老林藏躲慶成派令叅將張奉廷都司邢承誥
等分路剿捕該匪正在民房躲雨經官兵殲斃
二十餘人擒獲楊家寅等十三名訊係張士雲

張士熊股匪因東面官兵剿捕緊急欲往西面
找尋靳逆合夥等供訊明從逆日久之十一人
卽行正法其甫經被脅者二名均予釋放又據
寧陝同知張約稟報十九日探有零匪十餘人
在甘溝腦空屋內屯聚寨勇劉占魁等率衆前
往搜拏殺斃賊匪六名又生擒四名均係苟逆
股中牙手卽行正法又據孝義同知徐洪懿稟

稱該廳寨民伍希和等九人探得老林頭有零
匪三十餘人在民人彭姓屋內逼索糧食該寨
民前往搜捕立時殺斃六人戳傷六人將耳記
呈驗屬實又據該廳稟報軍功謝國治等帶勇
入山搜剿於賊夥中招出陳學舉等八名係河
南川楚民人因見免死黃旗情愿投出臣查該
犯等既係自行投誠自應遵

旨貸其一死然必須妥爲安置現飭該廳錄供具報

核辦並將寧陝孝義剿撫出力寨民等優加獎

賞以昭激勸臣現將官兵派撥三路一俟天色

稍晴卽令鎮將帶領由七畝坪高橋等處自東

向西分路排搜前進期與扎克塔爾慶成楊芳

數路官兵連絡剿捕再臣昨將苟逆妻子苟羅

氏苟三皮等提至軍營令其辨認苟逆首級確

鑿無疑此等首逆妻子未便稍涉寬縱於訊明
後均卽一併正法

額勒登保又奏言查自軍興以來蒙

皇上派出東三省官兵凡遇破敵衝鋒追奔逐北實
皆一以當百精銳倍常刻下苟逆餘匪無多藏
匿林箐只須步隊官兵分路搜剿馬隊官兵或
於林外或於平原藉壯聲勢惟在有而不在多

所有臣軍營及各路分帶東三省官兵除陣傷

亡故及前因傷病撤回之外現尙有一千五百

餘名當此功屆垂成自應酌量減撤臣酌擬於

盛京兵丁挑留一百五十名吉林挑留二百名黑

龍江挑留三百名三省挑留官六十餘員兵七

百五十名以備陝境剿捕餘匪之用其餘官兵

七百餘員名出師數久皆應先令凱旋以節鹽

糧而示體卹再此外有山西官兵一千餘名出

師日久可以撤回臣現已飭令趕緊清查歸集

由漢中起程各回原營又有直隸兵丁一千九

百餘名向在西鄉一帶防剿臣現在挑留兵二

千五百名並酌留得力官弁帶領其餘官兵四

百餘員名先令凱旋歸伍再查有江南壽春鎮

遊擊舒靈阿常州營守備朱國泰安徽守備張

廷棟河南王祿店守備邱斌勝汝寧營守備衛
汝超五員現無專帶之兵臣已飭令各回本任
其陝甘兩省帶兵官弁內如查有年老傷病者
卽均令各回任所再此次督剿苟逆股匪南山
內地勢之險阻剿辦之艱難久在

聖明洞鑒臣

督率侍衛將弁兵勇深入山林分路進

捕每遇山徑險仄之處各將弁兵勇不帶鍋帳

棄馬步行或冒雨進攻乘夜掩擊而七月以來
霧雨交加晝夜不止各官弁兵勇於人跡罕到
之區剿捕數旬之久霑體塗足遍身未嘗稍乾
手足爲荆棘刺傷腫潰者不一而足其奮勇實
爲可嘉其勞瘁又屬可憫今幸仰仗

天威渠惡業已授首自應察核勞績奏懇

恩施臣秉公查核擇其超衆出力屢著勤勞者開具

滿漢清單恭呈

御覽又軍火糧餉最關緊要而山內地方遼濶籌密
林深師行既無一定方向又無一定程途運供
實非易事撫臣陸有仁源源接濟於支供既形
充裕而

帑項不致多糜藩司溫承惠於軍需素能實心整
頓此次由峪外籌運糧餉辦理得宜且節次捐

廉製辦兵勇鞋帽解營分賞尤爲急公又陝安
道朱勲總理糧餉隨營兩載有餘稽覈嚴明現
又委令在漢南一帶查辦安置鄉勇事宜實爲
得力可靠又陝甘候補知府朱紱等隨營有年
或辦理文移稿案或催饋軍火軍糧以及辦理
寨堡團勇節次搜獲餘氛均各認真出力一併
開列清單懇

恩陞賞如蒙

聖慈俞允則各該員弁兵勇等自更感激奮興倍加

出力當此功屆垂成臣更得收指臂之效均奏

入

上命軍機大臣傳諭額勒登保曰額勒登保奏據稱各路將弁及寨勇等殲擒賊匪或數人或二三十人不等看來此時陝省所剩俱不過零星剿散之

賊與楚省情形不同祇須分投搜捕自可以次淨
盡額勒登保現在分兵三路派遣鎮將由七畝坪
高橋等處自東向西排搜聯絡剿捕所辦甚是陝
境之賊除苟文明業已殲斃外其餘如靳士黃張
士雲張士熊等皆非著名極惡首逆卽或殲擒之
後亦須由六百里奏報毋庸加緊馳遞至額勒登
保身爲經畧此時陝省餘匪固須搜捕肅清不可

稍涉草率但現在楚省賊數稍多昨據德楞泰等
奏到統計尙有二千餘人較之陝境情形更爲緊
要額勒登保自應移兵前往會同德楞泰趕緊辦
理速藏大功額勒登保接奉諭旨後如已將陝境
零星辦竣固當卽日赴楚如待至八月二十左右
尙有一二零星散竄之賊未能全數廓清額勒登
保亦不值以大兵爲其牽綴陝省現有楊遇春楊

芳等皆係本省提鎮於山內道路情形較爲熟悉
所有搜捕事宜即可酌留兵弁責成伊二人接辦
並知會總督惠齡巡撫陸有仁及新授將軍興奎
等督率官兵寨勇併力搜擒自可陸續辦竣額勒
登保卽帶同扎克塔爾等統領大兵取道平利並
令穆克登布帶領湖南湖北之兵一同隨赴楚省
會同德楞泰將該省未淨餘匪一鼓殲除肅清全

境彼時餘孽淨盡三省奠安額勒登保與德楞泰
勒保吳熊光等一同會晤即可告蒞大功用紅裏
黃面之摺聯銜具奏由六百里加緊馳遞候捷報
到時朕卽以之宣示中外所有剿辦大局卽屬完
竣勉之望之又另據奏酌撤滿漢官兵一摺現在
大功將竣無須多兵在彼額勒登保將吉林黑龍
江及山西直隸等省原調官兵除挑留之外皆先

令歸伍自應如此辦理但摺內祇言撤兵未言撤
勇前因裁鄉勇一事必須妥爲經理曾諭令額勒
登保等務於官兵未撤之前酌量先撤所有陝省
鄉勇額勒登保自己以次撤裁現在已撤若干並
著額勒登保查明具奏

上又命軍機大臣傳諭陸有仁曰據額勒登保奏現
將滿漢官兵酌撤先令凱旋其各路鄉勇自己遵

旨於官兵未撤之前先行裁撤此次未據額勒登保附奏著陸有仁即將陝省鄉勇現在已撤若干尚存若干詳悉查明具奏至陝省刻下兵勇已裁撤大半一切糧餉支發較前日益減少陸有仁當督飭局員核實撙節辦理所有續撥解陝銀兩如有贏餘卽存貯陝省以爲善後事宜之用勿任稍有浮冒

同日

上諭內閣曰現在陝省剿辦零匪將次完竣巡撫陸有仁三年以來經理糧餉俱能先事綢繆源源接濟供支充裕並督率地方官辦理堡寨搜捕零匪甚爲出力藩司溫承惠於該省糧餉堡寨事宜隨同辦理且節次製辦鞋帽解營分賞兵勇現據額勒登保於摺內奏及陸有仁溫承惠俱著加恩交

部議敘又據額勒登保奏此次殲淨苟逆股匪之
辦理軍務出力文武員弁兵勇查明分別開單懇
恩獎勵均照所請文職單內陝安道朱勳著加恩
賞加按察使銜候補知府朱綬知州銜知縣方載
豫二員俱著加恩賞戴花翎知縣顧紹先著加恩
以直隸州知州陞用知縣何紹衣著加恩以知州
陞用俱著先換頂戴縣丞王鳳坦府經歷羅應庚

候補縣丞向淮三員俱著加恩以知縣陞用遇缺
卽補候補縣丞張廷桂著加恩賞戴藍翎候補縣
丞候掛印著加恩遇缺儘先補用候補巡檢郭利
賓候補未入流劉廷獻二員俱著加恩以縣丞陞
用候選從九品陳朝綬著加恩留陝以縣丞陞用
捐職從九品許承緬王世琳二員俱著加恩留陝
以本班補用其武職單內遊擊伊昌阿黎炳都司

趙有倉神恩榮守備盧瑞清劉滿貴李萬年七員
俱著加恩賞戴花翎都司吳振亮守備丁永安呂
天俸三員俱著加恩賞換花翎千總王進德劉朝
高張世珍邵鎮陳喜把總張洪成朱效祖外委馬
良蒲明彭焯吳文學額外外委陳貴文貴兵丁莫
艷純鄧蓮王龍何志文王俸鄉勇軍功賓顯文劉
剛李國珍黃秀先劉經岳貴魯福山二十五員名

俱著加恩賞戴藍翎

初七日_巳吳熊光奏言查蒲添寶賊夥分股竄

往巴巫一帶叅贊德楞泰分投抄擊_臣以楚省

兵力素疲恐德楞泰一路勁兵追剿蒲逆入川

楚境各股零匪或聞大兵遠去復又竄合肆擾

當飭各路鎮將寨勇上緊截剿茲據房縣得勝

寨首王世銘稟報有零匪一股竄至夾馬槽經

該處寨勇攔截擊剿斃賊五名該匪復竄至板
峪溝等處該首領王世銘傳約附近各寨齊集
寨勇迎截殺賊十七名寨勇亦間有傷亡又據
副將樊雄楚蔣觀濤稟報戴崔二逆等由三里
坡竄至栗子坪有山內零匪與之合併約有四
五百人復由羅林溝向博磨坪一路東竄臣查
樊雄楚等所帶係由各處湊集兵勇未免單弱

而戴崔二逆又係著名賊目必須迅速剿除適
經畧額勒登保處撤回之湖南湖北官兵九百
餘名行抵房縣並據該弁兵等告請隨行

臣卽

飭原帶之遊擊李東宣等進擊足資剿辦至蒲
漆寶賊股

臣

接據探報該匪尙在川楚接壤山

內旋轉逃生叅贊德楞泰率同各將弁緊躡追

剿并據

臣

長齡書信該匪勢已日蹙設有餘孽

遁入川境德楞泰擬飭川省分防將弁接手搜捕德楞泰一路官兵仍行回楚督剿則楚境不股零匪當可迅速廓清應需糧餉臣已登飭運糧各員無分畛域源源供運不致缺乏

同日吳熊光全保奏言竊臣吳熊光查湖北軍

餉前蒙

恩撥河南江西兩省餉銀各二十萬兩除經陸續解

楚支用外現已所存無多查餉銀從遠省籌撥
往往解到需時不能旦夕卽至茲查湖南省捐
監銀兩截至六月底止已收足十萬正可先行
截留不惟免遠道解送之煩而目前卽得暫資
支放但爲數尙屬不敷仰懇

聖恩俯准於隣近省分再

賞撥銀四十萬兩共足五十萬兩以備接濟再據藩

司孫玉庭稟報以本年籌備軍米業已儘數撥
解省城並無儲備前欲於安徽一省籌撥十萬
石未知該省今歲收成若何難期撥運如數惟
有於隣省分別多寡酌量籌撥現擬於安徽湖
南二省各撥米三萬石河南省撥小米二萬石
如有不敷再飭司籌款添買川米及各色雜糧
二萬石搭配支用如此分投籌撥在各省不致

見缺而楚自實濟所需且輓運亦較簡便均奏
入

上命軍機大臣傳諭吳熊光曰蒲逆股匪昨據德楞
泰奏到竄入川界經兩路官兵兜擊截回楚境德
楞泰現已督同寨冲阿長齡等分投趕剿而勒保
亦與德楞泰會晤駐劄巫山昨已諭令酌派官兵
前赴楚省幫剿吳熊光發摺時想尚未得知此信

此時蒲逆一股已有德楞泰等專剿二竹歸巴境
內餘匪亦經德楞泰分飭孫清元德昌李天林等
分投追捕均無難尅日殲淨其戴崔二逆僅有四
五百人現經樊雄楚蔣觀濤剿辦吳熊光復將額
勒登保處撤回之湖南湖北官兵九百餘名飭令
原帶之遊擊李東宣等帶領幫剿所辦甚好計此
項新兵已較前數幾增一倍再加以樊雄楚等原

帶之兵爲數更多以之搜捕戴崔等殘匪自可一
鼓殄除吳熊光當嚴飭樊雄楚蔣觀濤等上緊剿
捕迅速辦竣不可稍延時日一得擒擒戴崔二逆
稟報吳熊光卽行馳奏至另摺請賞撥軍需銀兩
一節昨據全保與該督會銜奏到已照所請撥給
銀五十萬兩諭令馬慧裕由豫撥解銀三十萬兩
信山由兩淮撥解銀二十萬兩迅速赴楚應用茲

吳熊光又與全保會銜奏稱先將湖南捐監銀十萬兩截留再請賞撥銀四十萬兩看來此次奏摺伊二人並未關會茲合計前撥銀五十萬兩及截留湖南銀十萬兩已有六十萬兩之數帑項極爲充裕該督等務須督飭局員撙節支用如有贏餘卽存貯楚省以爲善後事宜之用又請撥軍米一項前次全保會銜摺內請於安徽省辦米十萬石

運楚朕卽以本年安徽州縣間有被旱之處糧食
恐未能充裕諭知王汝璧令其酌量情形能辦若
干卽解運若干茲吳熊光等奏請於湖南安徽河
南三省均勻酌撥所見甚是除安徽省自己遵旨
籌辦外現又諭令湖南撥米三萬石河南撥小米
二萬石迅速挽運赴楚該省得此餉糈接濟務須
源源供運毋稍缺悞以期速蒧大功

同日

上命軍機大臣傳諭高杞馬慧裕曰據吳熊光等奏
現在湖北軍需尙資接濟請於隣省籌撥著高杞
馬慧裕卽於湖南省撥米二萬石河南省撥小米
二萬石運往湖北以資接濟該撫等接奉諭旨後
或用價採買或動用倉穀著酌量情形妥爲辦理
總須趕緊協濟不可遲逾

初十日戊申惠齡奏言竊前月二十日額勒登保

前赴洵陽壩一帶督率搜剿臣由江口高關夾

嶺一帶偵剿前進途次接准提督慶成來信前

月十四日在藥庵子地方追及張二張三賊股

該逆等正在民房屯聚兵勇一擁衝入立斃賊

匪二十餘人生擒楊家寅等十三名餘匪四散

逃匿又捕獲活賊三名僅剩殘匪四五十人連

夜向西北奔竄又據通判雒昂稟稱在土嶺子
老林搜剿遇張逆殘匪當卽率勇冒雨追剿斃
賊十三名生擒十名張二張三各帶十數人分
逃是此股賊匪卽可淨盡其靳士黃陳文海等
匪經扎克塔爾格布舍楊芳等在南河腦小澗
溝等處節加擒斬止剩三百餘人由老林潛蹤
南竄扎克塔爾等已由佛爺坪一帶抄擊至荷

文明餘黨自首逆殲除之後均已喪膽驚魂不敢肆行竄擾或三五十人或七八十人零星逃匿日則深伏老林夜則潛竄寒硯覓食

臣飛傳

各寨堡並沿途面諭團寨委員及首領人等協力投拏倘有貪圖賊利賣給賊糧及窩藏餘匪之事一經查出定卽重治其罪該首領等咸知懾躍且見賊數日少膽氣旣壯人心亦齊遇有

賊匪覓食卽用鎗礮轟擊並有率衆出寨追襲
賊匪之事且彼此援應聲勢甚爲聯絡賊匪覓
食維艱自必益形渙散現在額勒登保又派副
將應元寬吳廷剛等帶領兵勇分投搜捕無難
迅就掃除奏入

上命軍機大臣傳諭惠齡曰陝省自苟文明一股辦
竣之後餘皆不過剿散之賊現任張二張三殘匪

經慶成及維昂兩路追剿復殲擒五十餘人該逆等祇各帶十數人分逃其靳士黃等殘匪據稱扎克塔爾等節次擒斬止剩三百餘人是此時陝省餘匪統計不足四百人之數無難立時辦淨不可延緩前以陝省零匪無多而楚省賊匪尙有二千人非陝省之比已降旨令額勒登保往彼協剿額勒登保赴楚之時自必將所帶勁兵酌留大半交

楊遇春楊芳等剿辦陝省零匪惠齡係本省總督
此時搜捕餘匪正該督分內之事惟當會同巡撫
陸有仁及將軍興奎提督楊遇春等督率地方文
武上緊緝拏並嚴飭寨硐民人無許藏匿接濟以
期迅速辦竣務絕根株不可以此時賊數不多稍

涉鬆勁